



Selasa, 09 Januari 2024
Ogen: Miha 4:6-13



Pemenan Si Mbaru



La lit persoalen si la erbuku, la lit ukumen si la erkudungen, kerina erbatas. Bage me paksa-paksa si lit, paksa si man bentasen, si man dalanen i bas kegeluhen enda. Bage me bangsa Israel i bas pengarapen ras dame siipadanken Dibata. Kenca si iukum enda ngenanami kiniseran ibahan Dibata me pemenan si mbaru. Maka bangsa enda jadi bangsa si mbelin dengen Dibata me jadi Dibatana. Kota Jerusalem si ipanteki, i je me Dibata njagai bangsana desken sekalak permakan. E maka amin pe lit kalak si ngarap runtuh, radas dengen iperangi tapi la ietehna kerina perukuren Dibata guna menai si mbaru ras bangsaNa. Ia nge kerina kena ukumen, isuruh Dibata me bangsaNa ngukum musuh-musuhna kerina. DIBata simereken gegeh man bangsaNa, e maka kerina barang rampasen imbang Israel ipersembahkan man Dibata. Man teptep manusia lit kesempatan si mbaru i bas kerina kegeluhenna. Labo ia arus iiket masa si lepas seh maka mesera kal iakapna 'move on' i bas kerina kecibal geluhna. Arah renungenta paksa enda, ibabai kita maka Dibata pe erbuku nembah ateNa, e maka iukuriNa lalap kai si banci ibahanNa si mehuli man bangsaNa. IrancangNa kegeluhenen bangsa e, amin bangsa e labo ngasup ngukuri si mehuli guna dirina jine.

Wari pesiwahken tahun 2024 enda enggo si aloken. Enggo sirancang, sisuraken, siarihken ras isi jabunta kai silakoken kita tahun enda. Erbage pemenan si mbaru si enggo sirencanakan, endesken e man Dibata gelah IA turut campur tangan i bas kerina sisuraken kita. Bagi nina kata belas-belas 'tuliskan semua rencana dan mimpimu di atas kertas dengan pensil dan berikan penghapusnya kepada Tuhan.' Ertina manusia ersura-sura Dibata sinentukanca, pemenan si mbaru e jadi totonta.